

Allannguutissatut siunnersuut

uunga

**Kalaallit Nunaanni Inatsisartunut qinersisarneq pillugu Inatsisartut inatsisaata allanngortinneqarnissaa pillugu Naalakkersuisut UPA 2017-imut suliniuteqaqqullugit Inatsisartut aalajangiiffigisassaattut siunnersuut. Taamaaliornikkut inatsisartunut qinersinissaq tulleeq nallertinnagu Avannersuup, Ittoqqortoormiit-Ilu immikkut inatsisartunut qinersiveqalernissaat qulakkeersinnaaqqullugu.**

Inatsisartunut ilaasortap Naaja H. Nathanielsen siullermeerutissatut saqqummiussaa.

1. Allannguutissatut siunnersuut imak oqaasertalerneqarpoq:

**Minnerunngitsumik qinersiviup ataasiinnaanerata attatiinnarneqarnerata iluaqutigisinnaasaasa ajoqutigisinnaasaasalu qulaajarneqarnissaat siunertaralugu, innuttaasut qinikkat aqputigalugit oqartussaaqatanerannut qinerseriaatsip atuuttup pingaaruteqassusia pillugu 2016 naatinnagu nalunaarusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

**Tunngavilersuut:**

1998-imi qinersiviit siusinnerusukkut arfineq pingasuusimasut ataasiinnanngortinneqarput. Allannguinnermut tunngavigineqarpoq Inatsisartut sulineranni nuna tamakkerlugu sulissineq piorsarneqarniarmat. Allannguinerulli kingornani Inatsisartuni arlaleriarluni oqallittoqartarpoq qinersiviup ataasiinnanngorsimaneranik apeqquusiisumik.

Kalaallit Nunaanni Namminersorneq pillugu isumalioqatigiissitap isumaliutissiisummini, aprilimi 2003-mi saqqummiunneqartumi qinersiviit arlalinngorteqqinnissai eqqarsaatersorfigivai, taamatut isumaliornermut tunngaviuvoq isumaqartoqarmat inatsisiliortut ilaasortaqaqarnermikkut sumiiffinnit tamanit sapinggisaq naapertorlugu ilaasortaqaqartariaqartut tassami inoqarfinni inukinnerusuneersut Inatsisartunut ilaasortanngorsinnaanerata ajornarnerummat.

Upernaakkut ataatsimiinnermi 2005-imi Inuit Ataqtigiit siunnersuutigivaat nunarput inatsisartunut qinersivinnut arlalinnut avinneqaqqissasoq. Inatsisartut taamani aalajangerput Aaqqissuussaannermut Isumalioqatigiissitap suliaa utaqqeqaarniarlugu inatsisartunut qinersiviit aggorneqarnissaanik suliap ingerlateqqinnginnerani.

Ukiakkut ataatsimiinnermi 2007-imi Kattusseqatigiit Parriata maanna Parti Naleqqamit siunnersuutigineqartoq siunnersuutigivaa. Taamanili saqqummiunneqarmat Inatsisartuni amerlanerussuteqartunit itigartitsissutigineqarpoq.

Ukiakkut ataatsimiinnermi 2011-mi maanna allannguutissasut siunnersuutigisara siunnersuutigaara. Siunnersuutaasoq taamani Naalakkersuisuusut taperserpaat, kisiannili akerliusut tapersersuisullu amerlaqatigiinnerat pissutigalugu siunnersuut peersinneqarpoq. Taamani 13-ni tapersersuipput, 13-nit akerliusut.

Isumaqarpunga allannguutissatut siunnersuutiga Parti Naleqqamit siunnersuutaasumit ingerlariaqqittoq. Isumaqarpunga qinerseriaaseq sorleq nunatsinni atussallutigu oqaluuserissallutigu tunngavissaqartugut, taamaattumik una allannguutissatut siunnersuut saqqummiuppara.